



KEMENTERIAN WILAYAH PERSEKUTUAN
Blok 2, Menara Seri Wilayah, Presint 2, 62100 Putrajaya
Tel: 03-8889 7888 Faks: 03-8889 7957
Laman web: www.kwp.gov.my

SIARAN MEDIA

UNTUK LIPUTAN MEDIA MASSA

PELANCARAN KEMPEN KIBAR BENDERA WILAYAH PERSEKUTUAN BERMULA

PUTRAJAYA , 21 Januari 2018 - Seluruh warga Wilayah Persekutuan Kuala Lumpur, Putrajaya dan Labuan hari ini bersama-sama menyertai pelancaran Kempen Kibar Bendera Wilayah Persekutuan yang diadakan serentak di ketiga-tiga buah negeri tersebut sebagai tanda permulaan kepada Sambutan Hari Wilayah Persekutuan pada 1 Februari nanti.

YB Datuk Seri Tengku Adnan bin Tengku Mansor, Menteri Wilayah Persekutuan bersama-sama 3,000 orang warga Putrajaya bersemangat mengibarkan bendera Wilayah Persekutuan yang diadakan di Dataran Putrajaya, Presint 3. Sebanyak 780 keping bendera telah dipasang di tiang-tiang lampu di Jalan Protokol, 240 keping bendera dipasang di premis-premis milik Perbadanan Putrajaya dan sebanyak 16,000 keping bendera telah diedarkan kepada komuniti dan sekolah-sekolah di sekitar Putrajaya bermula 8 Januari yang lalu. Turut diadakan program Kayuhan Ceria, Langkah Ceria @ Putrajaya, dan pelbagai aktiviti riadah bersama keluarga.

Di Kuala Lumpur, YB Dato' Dr. Loga Bala Mohan, Timbalan Menteri Wilayah Persekutuan hadir untuk melancarkan Kempen Kibar Bendera Wilayah Persekutuan dan KL Car Free Morning 2018 di Dataran DBKL bersama-sama 5,000 warga Wilayah Persekutuan Kuala Lumpur. Sebanyak 39,000 keping bendera Wilayah Persekutuan telah dipasang di seluruh ibu kota termasuk jalan-jalan protokol, premis-premis kerajaan dan swasta, sekolah-sekolah, PPR MTEN dan juga PA DBKL.

Di Labuan, YB Rozman bin Isli, Ahli Parlimen Labuan bersama-sama 1,500 warga Labuan melancarkan Kempen Kibar Bendera di Dataran Labuan. Bertambah meriah bendera Wilayah Persekutuan ini dikibarkan oleh konvoi motosikal berkuasa besar ke sekitar Wilayah Persekutuan Labuan. Sebanyak 2,000 keping bendera telah dipasang di seluruh Wilayah Persekutuan Labuan. YB Rozman juga melancarkan pertandingan menghias bendera Wilayah Persekutuan di premis kerajaan, swasta, kenderaan dan juga rumah kediaman.

Oleh itu, semua warga Wilayah Persekutuan adalah digalakkan mengibarkan bendera Wilayah Persekutuan di lokasi-lokasi yang bersesuaian sebagai tanda sokongan dan semangat cintakan Wilayah Persekutuan.

Tema sambutan Hari Wilayah Persekutuan kali ini masih dikekalkan dengan tema **'Wilayah Ceria Rakyat Sejahtera'**. Tema ini dilihat sangat memberi impak yang positif kepada semua warga Wilayah Persekutuan juga kepada pihak Kementerian dan agensi dalam menjaga dan memelihara Wilayah Persekutuan agar sentiasa ceria sekaligus dapat meningkatkan kesejahteraan warganya.

Sebanyak 30 program utama akan dilaksanakan sepanjang bulan Februari ini. Antara program yang bakal berlangsung adalah mengikut kluster ilmiah dan kerohanian, sukan dan rekreasi, turun padang, tanggungjawab sosial masyarakat, pengiktirafan dan juga mesra rakyat. Kesemua program yang dirancang ini meliputi seluruh lapisan umur masyarakat dari kanak-kanak, belia, orang dewasa, dan juga keluarga. Oleh itu, semua warga Wilayah Persekutuan dijemput hadir ke semua program yang bakal diadakan kelak.

**Disediakan Oleh
Bahagian Komunikasi Korporat
Kementerian Wilayah Persekutuan**